

S A O P Š T E N J E



Premijer Vlade Federacije Bosne i Hercegovine Fadil Novalić danas je (18.04.2016.) posjetio Ured za reviziju institucija u Federaciji Bosne i Hercegovine. U razgovoru sa Dževadom Nekićem, generalnim revizorom Ureda za reviziju institucija u FBiH i njegovim zamjenikom Draganom Kolobarićem, premijer je istakao da mu je namjera upoznati Ured za reviziju i razgovarati sa njegovim čelnicima. Naglasio je da je opredijeljenost i Vlade i Ureda za reviziju da budu čuvari javnoga novca, koji treba transparentno da se troši. Ured za reviziju je taj koji ima uvid u trošenje javnog novca i koji u svojim izvještajima ukazuje na propuste i odgovornosti imenovanih dužnosnika u pogledu trošenja i upravljanja javnim novcem.

U otvorenom i sadržajnom razgovoru sa premijerom Vlade Federacije BiH, Dževad Nekić, generalni revizor je istakao da je uloga Ureda za reviziju vrlo značajna i da su revizijski izvještaji pokazatelji kako se upravlja javnim novcem, u kojoj mjeri se poštuju zakoni i u kojoj mjeri se poštuju preporuke Ureda za reviziju. Revizijski izvještaji treba da budu putokaz zakonodavnoj i izvršnoj vlasti u pogledu korektivnih mjera koje treba da doprinesu pozitivnom poslovnom okruženju za dobrobit građana BiH.

Generalni revizor Ureda za reviziju je, u najkraćem, upoznao premijera Novalića o aktuelnostima iz rada Ureda za reviziju, uz podsjećanje na zakonsku nezavisnost Ureda za reviziju u odnosu na izvršnu vlast. Ured za reviziju će, istakao je generalni revizor, biti otvoren za saradnju sa izvršnom vlašću u pogledu davanja informacija nakon provedenih revizija, zatim konsultacija u pogledu poboljšanja ekonomskog ambijenta, ali bez ugrožavanja punog zakonskog kapaciteta nezavisnosti Ureda za reviziju. Poslodavac Uredu za reviziju, istakao je generalni revizor, je Parlament Federacije BiH, odnosno Parlamentarna komisija odgovorna za reviziju, koja osigurava finansijsku, funkcionalnu i organizacijsku nezavisnost Uredu za reviziju.

Visoki dužnosnici otvorili su mnoga pitanja iz oblasti ekonomije, razmijenili mišljenja o trenutnom stanju u privredi i javnom sektoru, i podržali stavove da aktivnosti i Ureda za reviziju i Vlade Federacije imaju jedinstven zadatak, a to je poboljšati ambijent građanima i osigurati im povjerenje u rad institucija javnog sektora.

Odjeljenje za ljudske resurse i komunikacije